



**Komunikadu Imprensa**  
**Tribunál Distritál Dili**  
*18 Fevereiru 2016*

**Tribunál kontinua aplika instrumentu CEDAW ba krime ho natureza  
violénsia doméstika**

Iha 12 Fevereiru 2016, Tribunál Distritál Dili prezide leitura akordaun no kondena arguidu CdC ho pena prizaun tinan 3 suspende ba tinan 5. Tribunál mós aplika devér adisionál hodi haruka arguidu apresenta-an ba tribunál kada fulan dala 2 durante periódu tinan 1. Tribunál prova katak komete krime maus tratus ba konjuje hasoru nia feen, iha Distritu Dili.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje konjuga ho artigu 35 (a) husi Lei Kontra Violénsia Doméstika.

“JSMP apresia desizaun tribunál tanba utiliza instrumentu legal CEDAW nu’udar referensia hodi halo desizaun. Desizaun ne’e nu’udar pratíka diak atu asegura justisa ba vítima violénsia bazeia ba jéneru,” dehan Luis de Oliveira Sampaio, Diretór Ezekutivu JSMP.

Tribunál prova katak iha 1 Abril 2011, arguidu tuku dala 1 iha lezada nia hasan sorin loos no riba lezada ba iha rai.

Maizumenus liu tiha semana ida, iha fulan Abril 2011, arguidu hodi ai-pedasuk baku iha lezada nia kelen no liman fuan boot nune’e rezulta lezada sofre bubu no moras iha kelen no liman fuan boot.

Tribunál mós prova katak liu tiha loron 3, hosi akontesementu segundu, iha fulan Abril 2011, arguidu lori kapasete tuda iha lezada nia ulun no kauza lezada nia ulun bubu no moras. Problema ne’e akontese tanba lezada ho arguidu istori-malu kona-ba osan.

Tribunál mós deskobre katak durante sira moris hamutuk arguidu baku bebeik lezada no bandu lezada labele ba buka servisu no kontinua nia eskola iha universidade.

Tribunál konsidera katak faktus foun ne’ebé agrava mak arguidu bandu lezada atu la bele ba servisu, labele ba kontinua nia estudu no la bele sai husi uma no halo movimentu iha liur.

Bazeia ba faktus foun ne’e, tribunál halo alterasaun la-substansiál tuir artigu 273 (1) Kodigu Prosesu Penál. Iha artigu ne’e defini katak kuandu iha produsaun-de-prova nia laran mosu ba faktus foun ne’ebé latama iha akuzasaun maibé iha interese ba desizaun no la hasae pena

aplikavel nia limite másimu, ofisiozamente k atuir rekerimentu, tribunal fó hatene ba ministériu públiku ka defensor atu prepara sira nia pozisaun prosesuál.

Iha leitura akordaun ne'e, tribunál introdus ba arguidu kona-ba artigu 5 letra (a) hosi Konvensaun kona-ba Eliminaun Forma Diskriminasaun Hotu-hotu Hasoru Feto (CEDAW) katak Estadu parte sira sei foti medida hotu-hotu ne'ebé loos atu muda modelu ka padraun kona-ba mane no feto nia hahalok sosiál no kultura atu nune'e bele halakon tiha pre-konseitu no hahalok tuir kostume nian, ka sira seluk ne'ebé harii ideia kona-ba mane ka feto nia inferioridade ka superioridade, ka sira nia papél estereotipadu.

Aleinde ne'e tribunál mós sita artigu 11 CEDAW katak Estadu parte sira kompromete atu foti medida hotu-hotu hodi halakon diskriminasaun hasoru feto iha áreia empregue nian atu bele garantia direitu hanesan ba mane no feto.

JSMP observa katak tribunál kontinua mantéin sensibilidade hodi proteje vítima violénsia bazeia ba jéneru liu husi desizaun ne'ebé refere ba konvensaun CEDAW.

JSMP fiar katak desizaun ba kazu ne'e sai hanesan referénsia di'ak ba tribunál seluk atu konsidera, tanba desizaun ne'e manifesta prinsípiu husi Konvensaun CEDAW no konvensaun seluk ne'ebé estadu RDTL ratifika.

Depoide avalia faktus provadu sira ne'ebé produz durante julgamentu, tribunál konklui prosesu ne'e no kondena arguidu.

Kazu ne'e rejista iha tribunál ho Nuc. 1210/11.PDDIL no julgamentu ne'e prejide hosi juis kolektivu ne'ebé representa hosi Dra. Jacinta Correia da Costa. Enkuantu ministériu públiku representa hosi Dr. Pedro Baptista no arguidu hetan defeza hosi Dr. Marcelino Coro hosi defensoria públiku.

Atu hetan informasaun liutan favor kontaktu direitamente:

Luis de Oliveira Sampaio  
Diretór Ezekutivu JSMP  
Direasaun e-mail: [luis@jsmp.minihub.org](mailto:luis@jsmp.minihub.org)